

Nipilersortartut nipilersornikkut isertitaat B-tut nalunaarsorsinnaangortinnissaat pillugu, A-tulluunniit akileraartussatut nipilersortitsisumiit akissarsitinneqartarlutik toqqagassinneqarsinnaangornissaannut periarfissat pillugit Naalakkersuisut misissoqqullugit Inatsisartut aalajangiiffigisassaattut siunnersuut. Inatsisitigut suut allangortinneqassanersut misissuinerup qulaajassavai, qanorlu taamatut aaqqissuussinikkut allaffissornikkut aningaasatigullu kingunerissanerai takutinneqassallutik. Misissuinnerup inernerai Inatsisartunut agguanneqassaaq kingusinnerpaamik UPA2023.

(Inatsisartunut ilaasortaq Aqqalu C. Jerimiassen, Atassut)

Akissuteqaat

(Aningaasaqarnermut Naligiissitaanermullu Naalakkersuisoq)

Siullermeerneqarnera

Siunnersuuteqartup nipilersortartut nipilersornikkut isertitaat B-tut nalunaarsorsinnaangortinnissaat pillugu, A-tulluunniit akileraartussatut nipilersortitsisumiit akissarsitinneqartarlutik toqqagassinneqarsinnaangornissaannut periarfissat pillugit Inatsisartut aalajangiiffigisassaattut Naalakkersuisunit misissorneqassasut kissaatigaa.

Ullumikkut malittarisassat atuuttut nipilersortartunik innuttaasut allanut naligiisitsipput. Nipilersortartunut immikkut malittarisassaqaanngilaq. Nipilersortartut taamaammat akileraartarnikkut ilanngaatinu allatuulli allaanerunngitsunik periarfissaqarput.

Isertitat arlallit A-p B-llu killingisa akornanni inissisimapput. A-tut isertitat nalinginnaasumik akissarsiaapput aamma B-tut isertitat, soorlu inuussutissarsiornermi aamma siulittaasuunermi allatut isertitaallutik. Pisortaqaarfinnut, innuttaasunut aamma suliffeqarfinnut nassuiaassutinik, A-tut isertitat killingi qaqugu atornissaannut ikiorsiissutinik nalunaarusiortoqarnikuuvoq. Tamanna isumaqarpoq nipilersortartut, nipilersornikkut suliassinneqarnermi isertitai A-tut allattorneqartartut.

Malittarisassat atuuttut akileraartarnerup aaqqissuussami pingaarnertut tunngaviinut atassuteqarput. Isertitanit akileraarutit allaffissornikkut akileraartitsinissamut piumasaqaatit, A-mik akileraarutit isertinnissaannut akilerneqarallarnissaannullu aningaasanik akiliinissami piumasaqaatini inissisimaneri peqqutigalugit pisariinnerulersitsipput. Tamanna isumaqarpoq akisussaaffik sulisitsisumiittoq imaluunniit aaqqissuussisumi.

Isertitat amerlanerit, A-mik isertitatut sularineqarpata, suli allaffissornikkut pisariinnerussaag.

Isertitanit akileraarutit immikkut eqimattakkaanut allaanerussappata, immikkut malittarisassat allaffissornikkut annertusisitsissammata aamma aaqqissuussinermik pisariinnerulersitsissammata eqqarsaatigilluaqqaarneqassaaq. Inuussutissarsiortut tamarmik tunngavilersueqataasinnaassapput, tamarmik immikkut piumasaqaateqarlutik, tamannalu aaqqissuussamik pisariitsumik atatitsiniarnermut ajornakusoortitsisinnaavoq. Nipilersortartut saniatigut oqalutsit, umiatsiaararsorluni aalisartut aamma innuttaasut allat immikkut periarfissanik kissaateqarsinnaassapput.

Taamaammat siunnersuut innuttaasut sulliffeqartullu sorlernut akileraartarnermi aaqqissuussanut immikkut malittarisassaqaassanersut oqallisigineqartariaqarpoq. Nipilersortartunut allannguisoqassappat, eqimattakkaat allat assingusut assinganik pineqarnissamut piunasaqaateqarsinnaassapput. Taamaammat tamatumani, eqimattakkaat aalajangersimasut immikkut malittarisassiorneqassanersut apeqquuserneqartariaqarpoq, imaluunniit tunngaviusumik malittarisassat qimerloorlugit piffissarisatsinnut tulluartuunersut nalilersorneqartariaqarnersut.

Naalakkersuisut akileraartarnermut tunngatillugu annertuumik ukiorpaalunnillu ingerlasumik suliamik aallartitsipput. Akileraartarnermik aaqqissuusseqqinnerup pingaarnermik aamma piffissaq ungasinnerusumi akileraartarnermik allaffissornikkut pisariillisaaneq siunertaraa. Pisariillisaanerup nammineq suliat ikinneruleneri aamma allaffissornikkut ingerlatsinerit maskiinanut suliassanngortinneqarnerat nassatarissavaa. Malittarisassanik allatut atuutsitsineq imaluunniit eqimattakkaat aalajangersimasut akileraartarnermut immikkut aalajangersaaneq tamatuminnga anguniakkamut akerliuvoq. Siunissami isertitat amerlanerusut isertitat A-tut ilaassapput, tamannami allaffissornikkut pisariillinerussammat.

Naalakkersuisut nipilersortartut akileraartarnerannut pissutsinik akileraartarnerup nutarterneranut atatillugu misissuinissamut ammapput. Naalakkersuisulli 2023-mi upernaakkut ataatsimiinnermi immikkut agguataarinernut kissaatigisat isumaqatiginngilai. Taamaammat siunnersuut ataani allaqqasoq Naalakkersuisut siunnersuutigaat:

Naalakkersuisut akileraartarnermik nutarterinermut ilanngullugu, nipilersortartut eqqumiitsuliortullu isertitaannik ajornannginnerusumik assigiiaarnerusumillu qanoq pisariaqartitsinermik misissuinissamut peqquneqarnissaat pillugu Inatsisartunut aalajangiiffigisassatut siunnersuut.

Allannguutissatut siunnersuut akuerineqassappat, Naalakkersuisut nipilersortartut tunngaviusumik akileraartarnermut ajornartorsiutigisinnaasaat aamma qanoq taakku annertutiginerat peqatigiiffinnut attuumassutillit, atorfeqarfiit il. il. paasiniaaffigissavaat.